

Naalakkersuisut suleriaasiat pillugu Namminersorlutik Oqartussat nalunaarutaat

Inatsisartut Naalakkersuisullu pillugit Inatsisartut inatsisaat nr. 26, 18. november 2010-meersumi § 23, imm. 1 naapertorlugu aalajangersarneqarpoq:

Kapitali 1

Aaqqissuunnera aqunneralu

§ 1. Inatsisit naapertorlugit pisinnaatitaaffiit Naalakkersuisunit atorneqartut imaluunniit Naalakkersuisunut ilaasortap aalajangersimasup atugai Namminersorlutik Oqartussat qullersatut Naalakkersuisunut tunniussarai.

Imm. 2. Pisinnaatitaaffiit Naalakkersuisunit atorneqartut kapitali 2-mi malittarisassat aalajangiussat naapertorlugit atorneqarput.

Imm. 3. Naalakkersuisut aalajangersinnaavaat imaluunniit Naalakkersuisunut Siulittaasup aalajangersinnaavaa, kapitali 7-imi malittarisassat naapertorlugit suliassaqaarfiup aalajangersimasup iluani Naalakkersuisoq nammineq aalajangiisinnaassasoq.

Imm. 4. Naalakkersuisut Siulittaasuat politikkikkut ataqatigiissaarinermut ataatsimititaliamik ataqatigiissaarisussanillu pilersitsinnaavoq. Taakku katitigaanerit pisinnaatitaaffilu kaajallaasitatigut aalajangersarneqassapput.

§ 2. Naalakkersuisunut Siulittaasup Naalakkersuisunut ilaasortat akornanni suliassat agguaattarpai. Agguataarinert kaajallaasitami immikkut ittumi aalajangersarneqassapput.

Imm. 2. Naalakkersuisut ataasiakkaat akisussaaffimminni pisussaapput naalakkersuinikkut ineriartornissamut aallarniutigalugu iliuuseqarnissamik inatsisinillu il.il. suliqaarnissamut inatsisit atuuttut aammalu naalakkersuisooqatigiit isumaqatigiissutaat naapertorlugit.

Imm. 3. Taakku saniatigut Naalakkersuisut immikkut tamarmik Naalakkersuisunut isummersorfissianik pisarialinnik sananissanut pisussaapput.

§ 3. Naalakkersuisut immikkut tamarmik allaffissornikkut sulisuminnit ikiorteqarput, taakkulu naalakkersuisoqarfimmi imaluunniit naalakkersuisoqarfinni aaqqissugaasumik suliqaartarput.

Imm. 2. Naalakkersuisut immikkut tamarmik, Naalakkersuisut aaqqissuussaananerannut atatillugu nammineertunik Naalakkersuisumullu naammagittaalliorsinnaasumik ataani immikkoortortaqaarsinnaapput, inatsisitigut naammagittaalliorsinnaatitaaneq killilersorneqanngippat.

Imm. 3. Naalakkersuisunut tamanut immikkoortunik suliffinnik nammineertunik inatsisinik pilersitsinikkut peqarsinnaavoq, tassani Naalakkersuisumut naammagittaalliortoqarsinnaanngilaq.

§ 4. Inuit allattoqarfinni atorfillit Namminersorlutik Oqartussaqaarfik tamaat atorfeqaarfivaat.

Imm. 2. Naalakkersuisoqaarfimmi pisortassamik atorfinitsitsinermi Naalakkersuisut atorfinitsitsinissamut oqartussaasuupput.

Imm. 3. Atorfeqaarnermi pissutsinut malittarisassat ersarinnerusut kaajallaasitami immikkut ittumi aalajangersarneqassapput.

§ 5. Naalakkersuisut aalajangiisinnaassuseqarput ikinnerpaamik ilaasortat affaat ataatsimiinnermi najuuppata. Taamatut ataatsimiinnerit pisariaqartitsineq malillugu aaqqissuunneqarsinnaapput, ilaasortaq ataaseq amerlanerusulluunniit oqarasuaatikkut videokkullu ataatsimiinnermut atortut atorlugit peqataallutik.

Imm. 2. Taasinermi tamatigut Naalakkersuisut Siulittaasuat taaseqataatinneqassaaq.

Imm. 3. Taasisut naligiippata Naalakkersuisut Siulittaasuata taasineri aalajangiisuussaaq.

§ 6. Immikkut ittunik pisoqassagualuarpat, Naalakkersuisut Siulittaasuat, imaluunniit taamatut pisussaaffiligaasoq, Naalakkersuisunut isummernissamut tunngavissiaq tunngavigalugu siulittaasutut aalajangiisinnaavoq.

Imm. 2. Siulittaasutut aalajangiinissaq pillugu qinnuteqarsinnaaneq taamaallaat pisinnaavoq Naalakkersuisup suliassaqaarfimmut akisussaasuusup tapersiineratigut.

§ 7. Naalakkersuisut nalinginnaasumik ataatsimiittarput sisamanngornerit tamaasa nal. 10.00.

Imm. 2. Inatsisartuni ataatsimiinnerit nalaanni Naalakkersuisut Siulittaasuata aalajangiineratigut Naalakkersuisut akulikinnerusumik ataatsimiittarput.

Kapitali 2

Naalakkersuisuni akuersissutigineqartut

§ 8. Inatsisartut inatsisissaattut, nalunaarutissatut, akuersissutitut siunnersuutitut missingiutitut kiisalu akuersissuteqaarnermut immikkullu akuersissutitut missingiutitut, suleriaatsimi aalajangersariikkami oqaasertaqartinneqanngitsut, naalakkersuisoqaarfimmi suliassaqaarfimmut akisussaasumit Naalakkersuisumit akisussaasumit aqunneqarlutik suliarineqassapput.

Imm. 2. Missingiut Naalakkersuisunut aalajangiiffigisassatut saqqummiunneqassaaq. Aalajangiineq siunissami allaffissornermut najoqqutassanik erseqqarinnerusunik imaqarsinnaavoq. Matuma kingorna Naalakkersuisoq suliassaqaarfimmut akisussaasuusoq aalajangiisinnaavoq, takuuk kapitali 7.

§ 9. Inatsisartut inatsisissaattut nalunaarutissaannullu siunnersuutitut missingiutit kiisalu aalajangiiffigisassanut allanut isummernissamut tunngavissiat naleqquttumik annertussusilerlugit tusarniaassutigalugit Namminersorlutik Oqartussat naalakkersuisoqaarfinut allanut saqqummiunneqartassapput. Aammattaaq missingiut oqartussanut kattuffinnullu siunnersuummut soqutiginnissinnaasunut imaluunniit missingiutip naammassisarnerani pingaarutilimmik ilisimasaqartutut

isumaqarfigineqartunut oqaaseqarfigisassatut nassiunneqassaaq.

Imm. 2. Naalakkersuisoqarfik suliassaqaqfimmu akisussaasoq tusarniaanermut akissutigineqartuni tiguneqartuni tusarniaanermut akissutini qanoq annertutigisoq Naalakkersuisunut isummernissamut tunngavissiamut tulluarsarlugu ilanngunneqarsimanersoq oqaatigalugu nalunaarsuineramik suliaqassaaq.

Imm. 3. Taamatut missingiut sularineqarsimasoq Aningaasaqarnermut Naalakkersuisoqarfimmit tusarniaanermut akissummik siunnersuutip aningaasatigut kingunerisassaanik naliliineramik imalimmik ilalerlugu Naalakkersuisunut saqqummiunneqassaaq.

§ 10. Naalakkersuisoqarfiup suliassaqaqfimmu akisussaasup naalakkersuisoqarfimmik ataatsimik amerlanerilluunniit akornanni isumaqatigiinngitsoqarpat suliassaq Naalakkersuisuni sularineqannginnerani Naalakkersuisunut ilaasortat tamarmik immikkut suliamik saqqummiiffigineqassapput. Suli isumaqatigiinngitsoqarpat, naalakkersuisoqarfik suliassaqaqfimmu akisussaasoq ataatsimoorussamik isummernissamut tunngavissiamik, isumaqatigiinngissutip imarisaanik allaaserinnittumik suliaqassaaq.

§ 11. Missingiut akuersissutigineqartussatut inassuteqaatitalik, Naalakkersuisut suna isummerfigissaneraat nassuiarlugu, akuersissutigineqartussap imarisai aningaasatigullu kingunerisassai eqqarsaatigalugit, Naalakkersuisunut saqqummiunneqassaaq. Aammattaaq erseqqarissumik takuneqarsinnaassaaq, naalakkersuisoqarfiup suliassaqaqfimmu akisussaasup naalakkersuisoqarfimmi tusarneqartut ilaanni suli isumaqatigiinnginneqartoq, taamatullu takuneqarsinnaassaaq, oqartussaasunit, kattuffinnit il. il. malunnartumik akerliliissummik tigusaqartoqarsinappat.

Imm. 2. Taassuma saniatigut isummernissamut tunngavissiaq makkuninnga imaqaassaaq.

- 1) Qulequtaq: Naalakkersuisut sumut qanoq isummissanersut ersarissumik nalunaarneqassaaq.
- 2) Inassuteqaatit: Inassuteqaat tassaavoq imarisamigut aningaasartamigullu tunngaveqartinneqartussaaq, Naalakkersuisunit akuersaarneqarnissamik kissaateqarfusoq. Taamaattumik inassuteqaat imarisamigut aningaasaqarnikkullu tamakkiisuutinneqartassaaq.
- 3) Aallaqqaasiut: Isummernissamut tunngavissiap siunertaa, tunngavigisaa, imarisaa Naalakkersuisullu politikkiannut ataqatigiissuteqarnera naatsumik allaaserineqassaaq. Isummernissamut tunngavissiaq aalajangersimasumik missingiummik tunngaveqarpat, tamanna ilisimatitsissutigineqassaaq, suna pillugu suliassaq Naalakkersuisumit suliassaqaqfimmu akisussaasumit nammineerluni aalajangiiffigineqarsinnaannginnerneq, soorlu assersuutigalugu pissutigalugu aalajangiineq suliassarpassuarnut allanut pingaaruteqalersussaammat, imaluunniit pissutigalugu allaffeqarfimmi najoqqutassanik aalajangersaasoqarsimanngimmat.
- 4) Aningaasaqarnikkut sunniuteqaatissat: Aningaasaqarnikkut sulisoqarnikkullu sunniutaasinnaasut takussutissartaat. Tassannga takuneqarsinnaassaaq, ingerlatsinerneqartumut sanaartornermullu qinnuteqaatigineqartut aningaasaliissutit iluanni naammassinnaanersut, imaluunniit ilassutitut aningaasaliisoqarnissaanik qinnuteqartoqassanersoq. Pisumi kingullermi taaneqartumi naalakkersuisoqarfik taarsiullugu sipaarniutissanut siunnersuummik innersuussissaaq. Aammattaaq immikkoortoq taanna pillugu Aningaasaqarnermut Naalakkersuisoqarfiup tusarniaanermut oqaaseqaataata imarisai nalunaarutigineqassapput.
- 5) Tusarniaassut: Takusassiaq kiap tusarniaassummi missingiut tigummisimaneraa aamma Naalakkersuisoqarfimmi tamanna pillugu isummerneq.

- 6) Naligiissitsineq: Suiaassutsit akornanni naligiisitaaneq, inuit immikkut ittunik pisariaqartitalit unammilligassallillu il.il.
- 7) Attaveqaaqatigiinneq. Tamatuma kingorna missingiut pillugu aalajangiinissaq immikkut ittunik attaveqarnissamik pisariaqartitsippat, soorlu Inatsisartunut, soqutigisaqaaqatigiinnut allanut tamanulluunniit, taava tassani oqaatigineqassapput.
- 8) Atsiorneq: Isummernissamut tunngavissiaq Naalakkersuisumit pineqartumit naalakkersuisoqarfimmilu pisortamit imaluunniit naalakkersuisoqarfiup pisortaanut sinniisumit atsiorneqassaaq.

§ 12. Isummernissamut tunngavissiami inassuteqaat eqqorluartumik oqaasertalorsimassaaq, imaqarniliami Naalakkersuisut aalajangiinerattut toqqaannartumik oqaluttuaqqinneqarsinnaassalluni.

Imm. 2. Aammattaaq nalunaarutigineqassaaq, aalajangerneq pillugu suliffeqarfimmi avataanilu soqutiginnittut atassuteqarfigineqassammata, tusagassiuutaasinnaapput, kiisalu nittartakkami tamanut saqqummiunneqassammat. Taamaattumik inassuteqaat paasissutissanik inunnut paasissutissanik mianersuuttariaqartunik paasissutissalluunniit allanut oqaatigeqqusaanngitsut pillugit imaluunniit allatut iliorluni tamanut saqqummiussinissamut naleqqutinngitsunik imaqartinneqassanngilaq. Aalajangerneq tamanut saqqummiunneqassanngippat, tamanna isummernissamut tunngavissiami takuneqarsinnaassaaq. Taamaassappat § 21-imi aalajangersakkat malillugit isummernissamut tunngavissiaq ilusilerneqassaaq Naalakkersuisunullu taamaallaat agguanneqassalluni.

§ 13. Isummernissamut tunngavissiaq, missingiut Inatsisartut inatsisissaattut imaluunniit nalunaarutissaattut siunnersuummik imalik Naalakkersuisunut saqqummiunneqarnissaa sioqqullugu Inatsisinut Immikkoortortaqarfiimmut inatsisinut periutsit atorlugit misissussavaa, tassanilu takuneqarsinnaassaaq, inatsisinut periutsit atorlugit misissuinermit oqaaseqaatit, takuuk aamma § 27, imm. 2.

Imm. 2. Nalunaarummut tassunga ilanngussaq isummernissamut tunngavissiap il. il. suliarineranut najoqqutassanik peqqissaarussanik imaqaassaaq.

§ 14. Pisuni immikkut ittuni Naalakkersuisut isummernissaannut tunngavissianut aamma ilisimatitsissutitut suleriaatsit aamma ilusissanut piumasaqaatit, takukkit §§ 11, 12 aamma 13 Naalakkersuisut Siulittaasuata akuersissuteqarneratigut, saneqqunneqarsinnaapput.

Kapitali 3

Aningaasaqarnermut Akileraartarnermullu Ataatsimiititaliamut suliassat

§ 15. Suliassat, Aningaasaqarnermut Akileraartarnermullu Ataatsimiititaliamut ingerlateqqitassatut inassutigineqartut suliassaqarfimmut naalakkersuisoqarfimmi Naalakkersuisumit akuersissutigineqareerneranni piaartumik Aningaasaqarnermut Naalakkersuisoqarfimmut qarasaasiakkut allaganngorlugit nassiunneqassapput.

§ 16. Isummernissamut tunngavissiat malitsigitillugu Aningaasaqarnermut Akileraartarnermullu Ataatsimiititaliamut akuersissutigisassatut saqqummiunneqartussat Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat taasumalu kingorna

malittarisassanngortinneqarsimasut naapertorlugit suliarineqarsimassapput missingersuusiortarnermut malittarisassat naapertorlugit imatut ilusilersorneqassaaq, imatut:

- 1) Aallarniutitut paasissutissanik imaqartinneqassaaq, susassaqrup sorliup siunnersuut saqqummiunneraa, siunnersuutip qanoq iliuuseqarfigineqarnissaata suussusia, aningaasartuutit katinneqarnerat imaluunniit ukiumoortumik aningaasartuutit iliuuseqarfigineqarnissaanut kiisalu ukiumut aningaasaliiffiusussamut aningaasartuutit sunniuteqaatissaat. Aamma isertitani tamanna atorpoq.
- 2) Suliamik saqqummiussaqrneq atuisinnaanermut siunertarineqartoq pillugu peqqutaasumik atuisinnaanerullu immikkuualuttortaannut nassuiaammik imaqartinneqassaaq. Aammattaaq suliamik saqqummiussaqrneq aningaasartuutitut assigiinngitsunut assigiinngiaartinneqassaaq kingornalu immikkut paasissutissanik piumasaqaateqartitsissalluni. Pissuseqataa isertitani atorpoq.
- 3) Aningaasaliissutit allanngortinnissaat pillugit inassuteqaatsinut aningaasanut inatsissami atuisinnaanermut siunnersuutigineqartumut aningaasaliissuteqarnissap utaqqisinneqarsinnaannginneranut peqqutaasut nassuiaatigineqassapput.

§ 17. Aningaasaliinissanut nutaanut allannguutinulluunniit suliassat Aningaasaqarnermut Akileraartarnermullu Ataatsimiititaliamut nassiunneqartinnagit tamatigut Naalakkersuisuni suliarineqaqqaartassapput.

Imm. 2. Suliaq Aningaasaqarnermut Akileraartarnermullu Ataatsimiititaliamut nassiunneqartussatut aalajangiunneqassappat, Naalakkersuisut Siulittaasuata Naalakkersuisoqarfianit ataatsimiinneq naammassineqarniariartoq allakkatigut nalunaarutigineqartoq tunngavigalugu atortussat kalaallisut danskisullu Aningaasaqarnermut Naalakkersuisoqarfirmut nassiunneqarnerat suliassaqrup qinnuteqartup isumagissavaa. Tamatuma kingorna Aningaasaqarnermut Naalakkersuisup Naalakkersuisut sinnerlugit suliaq Aningaasaqarnermut Akileraartarnermullu Ataatsimiititaliamut nassitissavaa.

§ 18. Suliat Aningaasaqarnermut Akileraartarnermullu Ataatsimiititaliami isertuussassatut oqaluuserineqartussat, suliaq isertuussassatut suliarineqarnissaa sooq kissaatigineqarnersoq tassunga tunngavilersuutigineqartoq allanneqassaaq.

Imm. 2. Isummernissamut tunngavissiaq isertuussassatut suliarineqassappat, tamanna Naalakkersuisunut isummernissamut tunngavissiaq qulequttami allanneqassaaq.

Kapitali 4

Naalakkersuisunut ilisimatitsissutit

§ 19. Naalakkersuisunut ilisimatitsissutit suliassaqrup pineqartumi Naalakkersuisut ilaasortaannit naalakkersuisoqarfirmilu pisortamit ataatigut atsiorneqartassapput, qulequtserneqartassallutillu erseqqissumik naatsumillu, Naalakkersuisut sunik ilisimatinneqassanersut. Aammali Naalakkersuisunut isummernissamut tunngavissiaq ilusilersorneranut najoqqutassat malinneqassapput, takuuk § 11.

Imm. 2. Naalakkersuisut ataatsimiinnerinut oqaluuserisassanut ilisimatitsissutit ilanngunneqassapput ataatsimiinnermilu atortussat allat peqatigalugit agguanneqassapput. Ataatsimiinnerni ilisimatitsissutit suliarineqassanngillat, kisianni Naalakkersuisut ataatsimiinnerinit imaqarniliani nalunaarutigineqassapput.

Imm. 3. Ilisimatitsissulli Naalakkersuisup pineqartup qinnuteqarneratigut imm. 2 apeqquaatinnagu Naalakkersuisut ataatsimiinnerini suliarineqarsinnaavoq, ilisimatitsissut sammisanik imaattunik

imaqassappat:

- 1) oqartussaaffeqarfik allamut attuumassuteqarpat,
- 2) naalakkersuinikkut aalajangiinerit pingaarnerit allannguuteqarnerannik imaqarluni,
- 3) kingusinnerusukkut aalajangiiffigisassatut Naalakkersuisunut saqqummiunneqassappat, imaluunniit
- 4) sammineqartup oqaluusereqqinneqarnissaanut isummanik atugassanik pissarsiniarnissaq siunertaralugu Naalakkersuisunut oqaluuserineqartussatut soqutiginaateqarpat.

Imm. 4. Sulianut ilisimatitsissutini oqaluuserineqartartuni imarisaannut tunngassuteqartuni aalajangiisoqarneq ajorpoq, aalajangiisoqarsinnaavorli suliaq Naalakkersuisunut isummernissamut tunngavissatut kingorna saqqummiunneqassappat.

Kapitali 5

Imaqarniliat

§ 20. Naalakkersuisuni ataatsimiinnerni imaqarniliat suliami pineqartumi Naalakkersuisut aalajangiiffigisaat taamaallaat oqaatigineqartassapput.

Imm. 2. Naalakkersuisunut ilaasortap Naalakkersuisuni aalajangiineq isumaqataaffiginngikkuniuk, Naalakkersuisunut ilaasortap pineqartup tamanna naatsumik tunngavilersuutitalerlugu imaqarniliamut allanneqarnissaa piumasarisinnaavaa.

Imm. 3. Naalakkersuisup ataatsip Naalakkersuisut ataatsimiinneranni oqaatsitigut ilisimatitsissuteqarnissani kissaatigissagaluarpagu, taanna kisimi tunngavigineqassaaq, ilisimatitsinerup nalaani suliami paasissutissanik pingaaruteqartunik saqqummersoqassagaluarp, imaluunniit Naalakkersuisuni suliarineqartariaqalerluni aalajangersimasumillu Naalakkersuisut taamatut imaqarniliornissamik aalajangiippata.

Imm. 4. Naalakkersuisut Siulittaasuata Naalakkersuisoqarfia Naalakkersuisuni ataatsimeereernerni Naalakkersuisunut ilaasortanut, naalakkersuisut allattaannut, naalakkersuisoqarfinni pisortanut kiisalu qitiusumik allaffeqarfimmi pisortanut imaqarniliamut missingiummik nassiussissaaq. Missingiut Naalakkersuisut aalajangiiffigisaannik piviusunngortitsisarnissamut tunngaviliisinnaangilaq. Imaqarniliamik akuerisaasumik sulii saqqummersoqanngitsoq aalajangiinerup piviusunngortinneqarnissaa pisariaqartinneqassappat, imaqarniliamut missingiummi takuneqarsinnaasutut, Naalakkersuisup pineqartup aalajangiineq taamatut paasisimassagaa naalakkersuisoqarfup pineqartup nakkutigissavaa.

Imm. 5. Naalakkersuisut imaqarniliamik akuersissuteqarnerisa kingorna Naalakkersuisut ataatsimiinneranni imaqarniliaq agguanneqassaaq.

Kapitali 6

Isertuussassaq

§ 21. Naalakkersuisut isummernissaannut tunngavissiaq Naalakkersuisunilu ataatsimiinnermit imaqarniliat isertuulluinnarlugit oqaluuserineqartassapput.

Imm. 2. Ilanngussat isertuussassaapput, tamanna ilanngussani allassimasutut nalunaarneqarsimappat imaluunniit suliaq isummernissamut tunngavissiamut ilisimatitsissummulluunniit atassuteqarnera allatigut takuneqarsinnaappat.

Imm. 3. Naalakkersuisunut isummernissamut tunngavissiaq taamaallaat Naalakkersuisuni ilaasortanuinnaq agguanneqarnissaa kissaatigineqarpat, tamanna isummernissamut tunngavissiami takuneqarsinnaassaaq. Isummernissamut tunngavissiap taamaallaat Naalakkersuisunut agguanneqarnissaanut tamanna pingaarutilinnik peqquteqartinneqassaaq. Isummernissamut tunngavissiaq inunnut ataasiakkaanut paasissutissanik mianerisariaqartunik imaqarpat, isummernissamut tunngavissiaq Naalakkersuisuni ilaasortanut taamaallaat agguanneqartariaqarpoq.

Imm. 4. Isummernissamut tunngavissiat, takuuk imm. 1, ilanngussallu, takuuk imm. 2, paasissutissanik mianernartunik imaqartut, isummernissamut tunngavissiat isumaqatiginninniartarnernut piginnaatitaanermik imaqartut suliassallu assingusut Naalakkersuisunuinnaq kiisalu Naalakkersuisut Siulittaasuata Naalakkersuisoqarfiani allattoqarfimmut taamaallaat agguanneqassapput. Isummernissamut tunngavissiat allat aamma naalakkersuisoqarfinni pisortaanernut aamma pisortanut kiisalu qiusumik allaffeqarfimmit naalakkersuisut allattaanut agguanneqassapput, taakkunannga suliassanik tigusisut suliani pineqartuni tamarmik immikkut Naalakkersuisortik siunnersorsinnaassagaat ikiorsinnaassagaallu siunertaralugu.

Kapitali 7

Naalakkersuisunut ilaasortanut oqartussaaffeqarfit

§ 22. Naalakkersuisunut ilaasortat namminneq suliassaqaqarfimmik iluanni suliani aalajangersimasuni tamani Inatsisartut inatsisaat, landstingip inatsisai imaluunniit landstingip peqqussutai, kiisalu Namminersorlutik Oqartussat nalunaarutaat, imaluunniit allaffissornikkut suleriaatsimut najoqqutassatigut aalajangersakkat naapertorlugit aalajangerneqarsinnaasuni, Naalakkersuisut Siulittaasuata tamatumunnga akuersissuteqarneratigut, aalajangiinissamut piginnaatitaapput.

Imm. 2. Inatsisini aalajangersakkani aalajangersaasoqarsimapput, malittarisassanit immikkut ittumik akuersinissamut Naalakkersuisut periarfissaannut tapiutaasumik, Naalakkersuisunut ilaasortaq suliami aalajangersimasumi nalinginnaasumilluunniit suliani inatsimmut ilaasuni Naalakkersuisut sinnerlugit immikkut akuersissuteqarnermut aalajangiinissamut piginnaatitaavoq.

Imm. 3. Naalakkersuisup nalunaarummit immikkut akuerneqarnissaq pisariaqartikkuniuk, immikkut akuersissuteqarnissamut aalajangersagaq erseqqissumik imaqanngippat, Naalakkersuisoq pineqartoq Naalakkersuisuni aalajangiiffigisassamik immikkut akuersissuteqarnissamik isummernissamut tunngavissiamik saqqummiussissaaq.

Imm. 4. Naalakkersuisoq isumaqaruni, suliaq aalajangersimasoq siunissami sulianut taamaattunut aalajangiinissamut immikkut tunngaviusoq pingaaruteqartoq, soorlu assersuutigalugu pissutigalugu immikkut akuersissuteqarsinnaanerup innuttaasunut allanut naleqqiullugu allaffissornermut sunniuteqarsinnaanera imaluunniit suliassaqaqarfiup iluani allaffissornikkut suleriaatsimik nutaamik aalajangersaanissamut pisariaqartitsisoqartutut isigineqarpat, imm. 2 apeqquataatinngu Naalakkersuisunut saqqummiunneqarsinnaavoq. Naalakkersuisunut isummernissamut tunngavissiami taamaattunik pisoqaraangat, tunngaviusumik pingaarutilik pineqarpat, imaluunniit periaatsimik nutaamik aalajangersaanissaq kissaatigineqarpat, siunissami suliat assingusut imm. 2 naapertorlugu suliarineqassapput.

§ 23. Aningaasaliissutiniq missingersuutitut sunniuteqanngitsunik kontut pingaarnert pigisallu tuniniarneqarnissaat pillugit inassuteqaatit akornanni nuussinerit pillugit suliat, aningaasaqarnermut inatsimmi oqaasertaliussat naapertorlugit Naalakkersuisut aalajangiiffigisinnaasaminnik peqarpat, tamanna Naalakkersuisunut saqqummiunneqartassanngilaq, suliassaqaqarfimmili pineqartumi Naalakkersuisumi Aningaasaqarnermut Naalakkersuisumut nassiunneqartassapput.

Imm. 2. Aningaasaqarnermut inatsimmi oqaasertaliussat naapertorlugit inassuteqaatinik aalajangiinissamut Naalakkersuisut sinnerlugit Aningaasaqarnermut Naalakkersuisoq piginnaatinneqarpoq.

Kapitali 8

Inatsisartunut suliat

Sulianik piareersaaneq

§ 24. Inatsisartut Suleriaasianni aalajangersakkat malillugit Inatsisartut ataatsimiinneranni Naalakkersuisut suliariterusutatik Inatsisartut ataatsimiinnerata aallartinnissaa kingusinnerpaamik sapaatip akunnerinik tallimanik sioqqullugu Inatsisartut Siulittaasuannut Naalakkersuisut suliassat tunniutissavaat.

§ 25. Siunnersuut sunaluunniit Naalakkersuisunit imaluunniit Naalakkersuisut Siulittaasuannit akuerineqaaqqaartinnagu Inatsisartut Siulittaasuannut nassiunneqarsinnaanngilaq takuuk § 6, imm. 1. Ataatsimiinnernut ullormut oqaluuserisassanut Naalakkersuisunit atortussanut ilanngunneqareersunut taamatut atuuppoq.

Imm. 2. Naalakkersuisut Siulittaasuata Naalakkersuisoqarfiata Naalakkersuisunit ullormut oqaluuserisassat akuerineqartut tamakkerlugit nalunaarutiginninnermut allattorsimaffik takussutissartalik Inatsisartut Siulittaasuannut nassiutissavaa. Atortussat Inatsisartuni suliarineqarnissaannut nassiunneqarnissaat, ilusiliussamut piumasarineqartutut atuuttoq naapertorlugu Inatsisartut Allattoqarfiannut nassiunneri Naalakkersuisut sinnerlugit suliassaqaqarfiit akisussaaffigaat.

§ 26. Naalakkersuisunut ilaasortat namminneq suliassaqaqarfimmik iluani Inatsisartut inatsisissaattut siunnersuutit, aalajangiiffigisassatut siunnersuutit nassuiaatillu nalunaarutigiumasatik pillugit isummernissamut tunngavissianik Inatsisartut ataatsimiilersinnagit Naalakkersuisunut nassiussissapput. Suliat nalunaarutigineqarnerani Naalakkersuisunut inassuteqaatit atortussanik naleqquttunik ilanngussiffigineqassapput.

Imm. 2. Naalakkersuisut Siulittaasuata Naalakkersuisoqarfiata Inatsisartut ataatsimiilinninneranni sulianik piareersaaneqarnermut pilersaarut nassiuttassavaa, Inatsisartunut saqqummiussisoqarnissaa siunertaralugu Naalakkersuisunut saqqummiunneqartussaq.

Inatsisartut inatsisissaattut siunnersuutit

§ 27. Inatsisartut inatsisissaattut siunnersuut Naalakkersuisuni suliarineqalersinnagu inaarutaasumik siunnersuut Inatsiseqarnermut Immikkoortortaqarfiup inatsisinut periutsit atorlugit misissoqqaassavaa.

Imm. 2. Naalakkersuisoqarfiup suliassaqaqfimmu akisussaasup suliassaqaqfinnut naalakkersuisoqarfiit Inatsisartullu Allattoqarfiata akornanni sapinngisamik isumaqatigiissuteqarluni Inatsisartut inatsisissaattut siunnersuut aamma Inatsisinut periutsit atorlugit misissuinnermut Immikkoortortaqaqfimmu Inatsisartut Allattoqarfiat aqutugalugu misissorneqarnissaa qulakkiissavaa.

Siunnersuutit aningaasaqarnikkut sulisorisatigullu tunngassuteqartunik imaqartinneqartut

§ 28. Aningaasaqarnikkut sulisorisatigullu kinguneqartussamik Naalakkersuisut siunnersuummik suliarinninnginneranni, Aningaasaqarnermut Naalakkersuisoqarfiimiit oqaaseqaammik pissarsiniartoqartassaaq.

Imm. 2. Aningaasaqarnermut Naalakkersuisoqarfiup peqqissaartumik misissuinissaa qularnaarniarlugu, Naalakkersuisuni suliarineqarnissaanut piffissaq killiliussaq nallertinnagu kingusinnerpaamik sapaatit akunneri marluk qaangiutsinnagit siunnersuummut missingiut Aningaasaqarnermut Naalakkersuisoqarfimmu nassiunneqartassaaq. Naalakkersuisut siulittaasuut taassumaluunniit sinniisua, pissutsit immikkut ittut atuunnerini sapaatit akunneri marluk killissarititaasut sanioqqunnissaanut aalajangiisinnaavoq.

Saqqummiussinnermut akissuteqaatinullu allakkat

§ 29. Inatsisartut inatsisissaattut siunnersuutitut saqqummiussutit akissuteqaatillu, aalajangiiffisassatut siunnersuutit apeqquteqaatillu aallaavigalugit oqallinnerit Naalakkersuisunit akuersissutigineqassapput.

Imm. 2. Siunnersuut Naalakkersuisut saqqummiussimasaat imaluunniit siullermeerinninnermi aappassaaneerinninnermilu Naalakkersuisunit tapersorneqartut, Inatsisartuni amerlanerussuteqartut isumaqatigiissutigisaat siunnersuutillu aappassaaneerinninnissamut pingajussaaneerinninnissamullu ataatsimiititaliamik suliarineqaratik ingerlatseqqinneqartut, aappassaaneerinninnermi pingajussaaneerinninnermilu akissuteqarfigineqartassanngillat.

Imm. 3. Ataatsimiititalianut isumaliutissiisut akerliusoqanngitsumik inassuteqaatitalik imaluunniit amerlanerussuteqartut inassuteqaataannik imalik, Naalakkersuisut inassuteqaataannut naapertuuppat, Naalakkersuisuni akuerineqartussat saqqummiunngu, Inatsisartuni aappassaaneerineqarnerani pingajussaneerneraniluunniit akissuteqarfigineqarsinnaapput.

Akuersissuteqaatit allakkat

§ 30. Naalakkersuisut Siulittaasuata Naalakkersuisoqarfiata naalakkersuisoqarfinnut pineqartunut akuersissummi allakkiaq tunniutissavaa, tamatumani allassimassalluni, Inatsisartuni oqaluuserisassat sorliit Naalakkersuisunut akuersarneqartut ingerlanneqartussaq.

Imm. 2. Suliassaqaqfimmu Naalakkersuisoqarfiup allagaq akuersissutaasoq atortussat ilanngullugit Inatsisartunut saqqummiussassatut Naalakkersuisut akuerisaat ilanngullugu Inatsisartut Allattoqarfiannut tunniutissavaa. Inatsisartut Allattoqarfiata naalakkersuisoqarfiimi suliassaqaqfiusumi suliap pineqartup allagaateqarfiani inissiiffiusumi allakkap akuersissutaasup tiguneqarnera uppersaatitalissavaa.

Naalakkersuisunut apeqqutigisatit

§ 31. Inatsisartut Suleriaasiat malillugu Inatsisartunut ilaasortaq § 37 naapertorlugu apeqquteqaammik taaneqartartukkut pisortat oqartussaaffia pillugu paasissutissanik piniarsinnaavoq.

Imm. 2. Apeqquteqaatigineqartut Inatsisartut Allattoqarfia Naalakkersuisut Siulittaasuata Allattoqarfianut nassiutissavai, tamatuma kingorna naalakkersuisoqarfimmut attuumassuteqartumut akisassanngorlugu apeqqut ingerlateqqissavaa, akissutigineqartup ilusilersorneranut naalakkersuisoqarfiit sorliit tusarneqassanersut paasissutissartalerlugu.

Imm. 3. Inatsisartunut ilaasortamit apeqquteqaat saqqummiunneqartumut akissutigineqartoq § 37 naapertorlugu apeqquteqaammut akissutigineqartoq nalinginnaasumik allakkatut ilusilernerqassaaq. Allakkat Naalakkersuisumit suliassaqaarfimmut akisussaasumit atsiorneqassapput Inatsisartullu Allattoqarfiat aqqutigalugu apeqquteqaateqartumut nassiunneqarlutik.

Imm. 4. § 37 naapertorlugu apeqqutinut akissuteqaatit sapinngisamik ullut suliffusut qulit iluanni pisassaaq. Piffissaliussaq tamanna eqqortinneqarsinnaanngippat, Naalakkersuisumit suliassaqaarfimmut akisussaasumit tunngavilersuutitalimmik, sooq piffissaliussaq eqqortinneqannginnersoq, qaqugulu akissuteqaat naatsorsuutigineqarsinnaanersooq apeqquteqartoq allakkatigut nalunaarfigineqassaaq, nuutineralu Inatsisartut Allattoqarfiannut.

Inatsisartuni ataatsimiititalianut kiisalu ataatsimiititalianik isumasioqateqartarnermi suliat

§ 32. Suliassat Inatsisartuni ataatsimiititalianukartut, matumani ilanngullugit suliat allat aningaasaliissuteqarnermut suliat eqqaassanngikkaanni Aningaasaqarnermut Akileraartarnermullu Ataatsimiititaliamukartut, Naalakkersuisumut suliassaqaarfimmut akisussaasumit pineqartumit ataatsimiititaliamut nassiunneqassapput.

Inatsisartut inatsisaannik atortussanngortitsisarneq

§ 33. Inatsisartut inatsisai atuutilersinniarlugit, Naalakkersuisut Siulittaasuannit atortussanngortinneqassapput.

Imm. 2. Ataatsimiinnerup naammassinerata kingorna Inatsisartut inatsisaannik akuersissutigineqartunik tamanik pappiaranngorlugit elektroniskkinngorlugillu Inatsisartut Allattoqarfiannit Inatsiseqarnermut immikkoortortaqaarfik tigusaqassaaq. Tamanna pisinnagu allannguutissatut siunnersuutit tulluarsarlugit ilanngunnissai Inatsisartut akuersissutigisimasaat Inatsisartut Allattoqarfia isumagissavaa. Aningaasanulli inatsisit ilassutitullu aningaasaliinissamut inatsit Aningaasaqarnermut Naalakkersuisoqarfimmiit pissarsiarineqartassapput, Inatsisartut akuersissutigisaannik siunnersuutini allannguutininik suliaqartartussamit.

Imm. 3. Inatsiseqarnermut Immikkoortortaqaarfiup inatsisit akuerineqartut atortussanngortitassat Naalakkersuisut Siulittaasuannut saqqummiutissavai. Atortussanngortitsinerup kingorna Inatsisartut Naalakkersuisullu pillugit Inatsisartut inatsisaat aamma Inatsiseqarnermut immikkoortortaqaarfimmi inatsisinut periutsinut najoqqutassat naapertorlugit nalunaarutiginninnissaa Inatsiseqarnermut immikkoortortaqaarfiup isumagissavaa, takuuk § 34.

Kapitali 9

Namminersorlutik Oqartussani malittarisassanik suliaqarnermut najoqqutassat

§ 34. Naalakkersuisut Siulittaasuata Naalakkersuisoqarfata Namminersorlutik Oqartussani malittarisassanik suliarinnittarnerni nalinginnaasumik najoqqutassanik aalajangersassaaq. Inatsisartut Inatsisissaatut siunnersuutiniq nalunaarutinillu suliarinnittarnermi najoqqutassat tamakku malinneqassapput.

Imm. 2. Naalakkersuisut Siulittaasuata Naalakkersuisoqarfia nalunaarutit suliarineqartarnerannut najoqqutassanik aalajangersaasinnaavoq, kingornatigut allannguutiniq Inatsisartut inatsisaannut ilanngussilluni, taamatut Namminersorlutik Oqartussat inatsisit pillugit nittartagaanni Namminersorlutik Oqartussat malittarisassaasat saqqummiussat nutaanik ilallugit ilanngunneqarsinnaapput.

Kapitali 10

Atuutilersitsineq

§ 35. Nalunaarut una ulloq 13. juuli 2022-imi atuutilerpoq.

Stk. 2. Peqatigitillugu Naalakkersuisut suleriaasiat pillugu Namminersorlutik Oqartussat nalunaarutaat nr. 18, 9, november 2017-imeersoq atorunnaarsinneqarpoq

Namminersorlutik Oqartussat, ulloq 12. juuli 2022

Múte Bourup Egede
Naalakkersuisut Siulittaasuut

/ Hans-Peder Barlach Christensen

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut